

巢經巢全集

第三函
第六冊

巢經巢文集卷第三

遵義 鄭 珍 子尹

記

斗亭記

地舊圃也余居竹溪之十二年始化蔬爲花木其前割田三之一爲方池源於檐而冬夏常不涸因種夫容其中緣以綠節遂爲外屏其中多鮪魚可玩可餌手植柳四五株蔭之上列雜樹四時皆有花而亭適當棗下大人嗜釣非深冬常在溪太孺人善病而好勞不可拂每日暄夕佳攜妻若妹若小兒女奉孺人坐亭上或据樹石誦書詠詩思昔賢隨遇守分之遺風或偕兒女黏飛蟲呼螻蟻觀其君臣勞逸部勒或學鵲楂楂鳴投綏花驚潛魚爲種種兒戲孺人雖笑罵之而紡軋絮織未嘗一輟手夏荷秋蘭梅萱冬春蓋三年於此矣咸曰亭無名何因以斗益之或問故爲之歌曰斗兮斗兮不余乎期亭之存兮繫余懷亭

不存今余之悲而余惟亭之存今斗今斗今歌終咸不能復問名亭之故竟無知者

重修魁星閣記

今天下求售文者必尸祝魁星橫宮之左右試院之前門鄉城之言秀所在比比樓閣而像祠之士大夫家則圖弄焉問其神咸曰魁也觀其像則魁服獐獐拳一足立手操筆若斗上曳七星蓋肖魁字爲之也或曰食此者爲唐進士鍾馗或曰本奎星後譌爲魁是皆不足致詰余按魁星乃南北二斗也說文訓魁爲羹斗則魁乃器名春秋運斗樞曰北斗第一至第四爲魁此就其形言之也器具魁杓魁因有首義書渠魁禮不爲魁皆首也故張守節注史記又謂魁斗第一星南斗與北斗位相值星象同惟杓少一星其第二星亦稱天魁要其似羹斗者南北並可稱魁也其祀典三代不見經文按周禮祀司中司命司民司祿及風師雨師並以繫民生專特祭斗建昏旦均五行於授時尤關重知必不

與列星合布幽宗通考云秦始皇時雍有南北斗廟以歲時奉祀漢宣帝立南斗祠於長安城旁史記載武帝祠泰一其壇下有北斗是秦漢重祀北斗矣魏晉後唯通典言隋令太史署常以二月八日於署廷中以太牢兼祀北斗二十八宿唐以後無聞者要其祀南北斗本以北斗運中央制四方南斗爲弔武經星復尊並北斗故重祀之非若今之以爲主文也今祀爲主文者其始必因魁榜魁天下之名謂其中必有主宰也爰呼爲魁禱祈之後因卽魁字圖像之而不知爲卽古南斗北斗之祭亦猶祀城隍者不知爲古八蜡之庸祀文昌者不知爲古天子爲羣姓諸侯爲國所立之司命耳至魁主文章則亦有說按文耀鉤云斗者天之喉舌易春秋六經聖人代天而言者也世之文章至八股極矣然作者苟不悖乎六經所言是亦取出乎天之喉舌者而言之耳言者心聲誠能肖天天必福之則於祀北斗宜若南斗據史記正義云六星主薦賢良授爵祿是正今之主司房考也其祀之也亦宜由此言之北斗之喉舌在我者也南

斗之薦授在人者也而北斗第五星曰衡正殿南斗然則其當人者乃卽我之
自爲衡也歟觀於天文而人文可以悟矣道光十四年遵義府學左重修魁星
閣成因撰此文卽以爲記

遊至大覺寺記

戊戌之冬十月幾晦聽鶯軒朝夢方熟侍者呼書至爰眼觀之曰昨約遊大覺
寺忘耶外及飯矣披衣出與諸人會於寓遂行出北門緣龍山麓緩步霜氣初
散旭日入江不熱不寒里許得道左刻餘至正元年閏五字不審何記也旁紀
萬歷十九年臥龍坊高傑妻司氏捨錢修道尺丈俱因石刻之里許得崇禎十
三年修冷水孔道碑里許得石鼻泉當道左穴出灌可四五百畝歲不涸其上
有洞口僅容貿梯下有人物象病乳求嗣者惑焉昔年曾入陰凜甚故不樂再
往數十步至後川橋一名普濟橋俗呼高橋也有店焉橋宋楊忠烈建竹颺溪
至此入穆家川溪上石壁平塋根多明人記漲到漫不可盡識白飛霞曾沐此

壁書水瀾瀾十二字省志載石壁仙題山齒齒云云誤也旁刻溪山青一詩草
款無識者然似三丰流矣上爲普濟菴明宏治中建李敬德有記旁三刻皆紀
重修者觀已與諸人飯更沽酒及午食傭一童攜之折西北行二里許得螃蟹
井穴有異蟹能晴日泛水溢田實清淺一泓也里許下度紅邊橋橋東一古樹
爲巨藤婁絡垂青若罽毼若鱗髯峭蒨可玩復上坡陀迴憶乘驛北去時昇者
遇如此必閣簣請鬆肩楚人謂代步也因相與大笑汗微出脫袂衩令童披之
則居然富貴者也復行三里許不悉地名四山善生蕨無他材石炭出其中郡
城火食大半仰此耳中水輪聲漸來南折得杉林栗溪經其下水自海龍國流
來下會穆家川稍憩杉下度石杠入大覺寺本舊刹康熙初資中人閔相誅植
莊嚴時極偉麗今存木樨紫薇之屬蓋無幾佛室木聯三明郡人程副使書得
北海意求志軒遺墨僅見此左出小門緣叢竹一巖出溪上其根虛無其樹皆
胎石緣石東出經仙洞久無入者所謂山腹奇蹤巖懸梵景俱無自得北折大

穴間然石離奇斜下極於潭日光罅入湫之水非金非碧似井西晴嵐暝翠山頭魚數羣倏來倏去坐觀魚臺睨之似遊晴窗下玻璃瓊中穴口刻隸書石穴游鱗填其廊因明白矣旁刻栗溪吟並閱相書東不十武復一小穴景同惟俛視異緣小穴旁北上得朱萼巖外折上爲映月臺俛潭之深碧入臂後石勢蓋象蓮花峯也緣巖層西折上爲靈碧峯至顛度天橋屈曲下俱險絕倚石坐臥觀竹列湖山大覺寺之勝盡在此一巖矣余因誦俛仰之間已爲陳迹恐此生不再至乃獨往小穴復玩久之小篆觀我生於石至寺後觀閱相墓荆棘羅生爲之悵惘復入寺飲酒下以葵子飯水引肴以肚茵茵比雞縱味等腴嫩過之其蓋不圓無心中途售者噫天下事孰非無心而得者哉同遊者爲傳四黎一莫五獨傳四騎馬馬上如春鉏絕可笑

遊迴龍山記

己亥

遵義環城山水巖壑之雄峭樹木之挺異莫右於迴龍山其山自碧雲峯支出

蜿蜒東行十里許穆家川趨其足遂峙爲此山其山陰肉而陽骨骨者石也外著者也以負蓄厚故其石磔磔角角壁者窟者窞者突者脊而下迤者將而上累者欹蓄不思若驟而若飛者靡不駢駁闐辨以合爲此山上干青天下臨沈淵而其氣一洩於樹故其樹直上數仞而不拔橫出數丈而不折隨其石之高下楚楚莽莽而柯莖芴離可數每與高風相遭則枝葉上下若江之潮海之濤其中朝暉夕曛若螺蚌搖光於方丈圓嶠也有伏泉息於踵列而清其聲泠泠嘗之則甘使人忘機唯智者別之外人徒震眩於巖壑樹木之足駭異而已余以有倦與一二人遊此頗自負知山故說之

辛丑二月初三日記

晨寤復寐莫五禮閣上文昌神亦不覺也起見架下書蒼蒼竹林寺詩念開歲來三十餘日昨夕始提筆作此字視前時每元日卽繙寫滿几案自疑是前生噫可涕也已記去年今朝母病愈數日春和天晴能偕孫兒女屋榮籬角坐暄

光中觀蔡臺果蕾以爲快余亦快庀少行李計明日赴茲閣母曰吾以病久愁
汝事至是得無慮及汝生日且歸耳嗚呼豈知今之今日視去歲之今日竟成
兩世耶當日以簠人子發憤讀書意有在焉今皆大非而奚以讀書爲也昔時
謂書不誤人而今知特誤人如田家兒目不識一字足終身不出十里黧面赤
胛以勤以勞以日夕唯力是奉得有余今日之悔哉視新購皇清經解十巨堆
插架上益感念用此奚爲也莫五方整理未已心境之相懸可勝歎耶書以爲
是日記

漢三賢祠記

辛丑

惟皇帝二十有一年三月二十七日郡校師莫公與傳創祠漢三先生於學宮
左之閣上珍甫練衣冠不敢奉幣從薦簋酌奠於三先生越數日莫公呼來告
曰孔子之道載在六經自經秦坑焚歷漢高惠文景皆武夫功臣用事徒黃老
清靜以與民休息詩書禮樂之教殆如草昧二三大師各抱其遺私教授鄉里

久乃稍稍爲章句傳故建元之際弟子著錄者漸多齊魯秦晉燕趙吳楚梁越之閒乃始諸儒雲爛霞蔚六經賴以復傳於時西南遠徼文翁爲之倡相如爲之師經術文章燦焉與鄒魯同風而文學公盛公卽以其時起於犍爲牂柯東漢以後儒者始不專一家講說至許鄭集漢學大成而尹公乃卽起於母斂僕嘗獨居深念六經堂構於漢儒守成於宋程朱諸子而大敗壞於明人及我太祖聖祖崇樸學教化海內一時朝野諸老宿痛懲前代空疏文巧之佛老吾道而力挽回之事必求是言必求誠支離憊怙之習埽棄淨盡於是漢學大明六經之義若揭日月至今二百年來數天下鏗鏗說者一省多且得數十人獨西南士僅僅意無乃淵源俎豆之不存歟而何其洽肌膚淪骨髓者之難破也僕廁此二十年無足爲多士師者爲多士求足師謂此邦萌芽文教斷以文學公爲祖而以盛公尹公左右之今祠成子其爲我序遵義當祠三先生之意某再拜謹案文學公爲犍爲文學卒史當漢景武間時犍爲治警警卽遵義地漢制

諸曹掾吏自除郡國中文學公卽不定警產要是下縣人無疑時爾正一經尙未名學文學公爲叔作注且在衆經注之前實遵義正祀樂祖盛公爲司馬相如友稱牂柯名士尹公召陵許君弟子以經義教南中二公於貴州當通祀於遵義有文學公爲主二公且後輩其左右之也誠宜小戴記曰凡釋奠者必有合也有國故則否鄭君注國無先聖先師則所釋奠者當與隣國合若周有周公魯有孔子則各自奠之今論先師三公皆國故於漢郡縣則盛尹二公爲隣國謂合否皆協禮制莫公此舉鉅而當哉謹又附爲說曰國朝經學能上接漢儒者壹以識字爲本凡字有聲有形有義六經聯字以成文字之聲形義明其於治經如侍先聖賢之側朗朗然聞其耳提面命也文學公深明雅故不待言盛公與相如游尹公從許君學凡將說文之傳必熟聞其終始在他邦猶將馨香之何況爲鄉先哲今日生其後者尙景嚮其風而求焉學之盛何遽後於他省吾知都人士必有高望而奮起者也是莫公祠三先生之意也夫亦三先生

所望於後賢也夫

遊城山記 辛丑

自道光以來邑多野狗實曰豺通四鄉日必食三四人往來儻忽一噪羣應物雖百斤者必盡一食一村有逐者數村戢焉蓋互相通也豚蠹物搏卽負而走搏犬必先與狎使之信而不疑也銜其頸牽之行若曰是爾自願就飽我者然犬有能者知不敵卽集兩三來通力死之是犬也雖蹈田浮於溪其死必矣是日出遊郡署之右山遇四五人執挺逐野狗且進且卻旋相呼食且盡矣且踰城下矣周視之無所見唯一婦人倚敗牆哽哽貽城堞不敢哭問故曰是吾兒也方五歲而如此觀山下左牆內坐槐陰雍容茶話者似吾守令提畫眉尋蚱蜢往來右牆內者似吾營官也故不敢哭也爲愴然久之行過市則有環而觀者或譏或怒或笑罵跼足於人肩隙窺之則木爲磨上扇橫植一鐵條末爲圈一狗旁立呼之磨則納首圈中行磨因轉與錢一卽轉一而其帖耳緩步意若

不樂者多與之錢呼者聲亦壯狗昂首舉尾爭旋而奔勢如風車與多者於傳
人中亦揚揚以爲人不如也自詫生將四十年始見人間有此事及暮歸殘秋
初寒鐙影黃葉瑟瑟坐空樓下思日中所遇臥不成寐起而嘆曰嗟夫不謂狗
之在今日其患如此其野者肆爪牙獷黠貪饕相求相應以我黃童白叟供一
啖之快城社所在尙不免他何如也而其爲人畜者又復出其狡獪以助人之
譎鬼使愚者不知其技止此而樂羣逐出資錢唯恐不一見此狗爲不幸世道
可勝嘆耶於時鼠出入米甕中蓋不屑喝之也

遊海龍國後書記

無定者其卽所以爲定乎不事焉事事焉不事事無事也無事事也百年有窮
哉天而雲雲而天土而木木而土人何獨非是也老氏謂此爲名佛氏謂之爲
緣吾儒曰此我也無此非我無我無此我也此也一也而淺者心生擬議焉異
哉宜百年皆苦憂也然不苦而憂又非事事事焉不憂焉不苦苦焉甘焉憂樂

焉甘樂相尋而吾以生吾以死視生死誠不當杯酒耳三日之遊吾誠有心乎
既遊矣焉無定心也遊者誠我乎既我矣焉非我也無此無三日三日復三日
遂成爲我焉亦焉往而不得哉思之可一笑

道光辛丑八月廿二余登海龍國明日由白雲頂而下過茂實家留一日
將去鐙下對酒憶荒茅絕頂中有一鬚髯丈夫落落拓拓仰天而噓未知
是我非我因書一篇付存之子午山孩

四國記 仁寅

遵義東界大山望之隱天若長壙其南爲三度關北爲板角關由遵義道湄潭
者出二度由綏陽者出板角二處山稍平展中距八十里皆亂峯斗壁其間長
坡坎者間道也自坎行若蝨循衣縫以達湄潭境余家至長坡坎蓋僅二十里
此山西皆樂安里地地皆陂陀平遠登高俛視數十里如微風動波也其去郡
西限標崖諸山又西限瑪瑙孔諸山又西限清乘橋諸山余自家朝食行二十

里登標崖復十里登瑪瑙孔復十里度清乘橋卽登山越山巔達郡四十里皆坦途矣此東來山數重獨清乘橋西諸山用兵時尤險要山蓋圖經所稱水圍者洪江三面環而過江兩岸皆懸壁一二百尺而西岸又羣峯若削山縫中今尙無羊牛徑舊時距今橋上里許岸稍缺處橋平石今猶有二齒存東來者意度橋必仍沿岸下直今橋越山蓋舍今山巔左右望皆窮也今橋康熙初當極險狹處建據碑乃易舊清水名清乘橋余往來必流覽橋上思當日措手之難至巔也必小息顧巔廣僅二丈而一畔舊砌依稀關門然餘隱露土中皆似門圯之石嘗疑之又不解橋名清水意今年初夏攜妻兒種菜子午山目極百里餘歷指某某地示之因擬議清水說皆不安之甚予知同旁植紫蘇曰人呼此祖師葉焉知清水清乘非青蛇乎余思久之曰是也當八路師之平播也陳璘軍由偏橋進明史璘傳曰璘次湄潭賊悉聚青蛇長坎瑪瑙保子四圍地皆險絕而青蛇尤甚璘乃先攻三圍次及青蛇督將攻三日三圍遂下青蛇四面陡

絕璘圍其三面購死士從瑪瑙後附葛至山背舉礮賊惶駭諸軍進攻賊退入
國內木石交下將士冒死上前後擊之賊大敗乘勝抵海龍圍下由此推之蛇
與水俗讀同僅分平上清水卽青蛇也橋以地名建者吳之茂武夫非紀碑不
得其字苟從俗改清乘以文之乎山巔似關門者非楊氏之雄關乎保與標聲
亦近今標崖非卽保子國乎然則長坡坎卽長坎國瑪瑙孔卽瑪瑙圍其名蓋
至今存也當時璘旣破板角四圍不破終不能抵海龍長坎保子瑪瑙三圍不
破終不能攻青蛇青蛇旣破此時李應祥破黃灘三關入在青蛇之南馬孔英
破朗山關入在青蛇之北逆酋心腹四潰無巨險可恃宜璘之鼓行至海龍如
走康莊矣嗟夫數十年往來熟習之地一旦啓悟於黃孺之口而始得古名天
下事千百年以上千百里以外可以影響論斷卽自詡得之乎故記以告考地
理者

望山堂記

千寅九月

望山堂子午山舊名也其義莫可根詰山韶興隱秀抱以二臂右者宛宛乎若垂腕側掌而襠其臍也太孺人墓於臍其腕圓平如石鼓東去墓六十七鯉步下於墓八尺廣袤不及四丈上爲屋前堂後室樓其上而周闌之成郡守爲順德黃仲孝給事問所以名者仲孝曰望山子之志也名之定久矣數可違哉因分署望山堂以顏其楣建時蓋畢葬越七月至是釋服乃記之嗚呼太孺人東遷以來借母家宅以居十年來嘗顧余歎曰吾欲廣數椽屋種一果一樹百年他人物吾何望而擲此力乎時余方求免家人凍餒之不暇雖心悲其言之苦意之傷而思副所願無術也後數年歲獲稍厚忍疏耐縷銖餘而橐蓄方思買四五畝地結茆植援俾樂其自有提孫孀婦朝暮按行怡怡然指新栽雅接謂某可反身食之某可及子孫食之庶幾辛苦一生至是暮年稍慰其意而豈知欲爲此者乃持以給斂殯屯夕之費也自去年營葬旣竣山中舊壑悉委閒地凡松梧竹桂櫻榴海桃之屬無不相所宜植之高高下下百卉咸集於時猶有